

इवनिंग डोगरी न्यूज़ बुलेटिन

समे .1815

<><><><><><>

## Headlines

- 1 मुख्मन्त्री उमर अब्दुल्ला होरें बक्ख-बक्ख मैह्कमें दिएं विकास गतिविधिएं दा जायजा लैता ते मंत्रिमंडल दे अपने साथिएं गी आखेआ जे ओह अपने मैह्कमें दे कम्म दी सक्रियता कन्नै निगरानी ते समीक्षा करन।
- 2 उपराश्ट्रपति जगदीप धनखड़ होरें आखेआ ऐ जे मनुक्खी अधिकार म्हेशां थमां भारत दे नैतिक ताने-बानें च शामिल रेह न।
- 3 प्रधानमंत्री नरेन्द्र मोदी होर कल नमीं दिल्ली च कर्मयोगी सप्ताह गी शुरू करोआंगन।
- 4 प्रधानमंत्री नरेन्द्र मोदी होर औंदी 22 तरीक गी कजान च ब्रिक्स सम्मेलन च हिस्सा लैने लेई रूस दे दऊं दिनें दे दौरे पर जांगन।

<><><><><><>

## **CM-Meet**

मुख्मन्त्री उमर अब्दुल्ला होरें अज्ज श्रीनगर आले सिविल सचिवालयच केई सारे मैह्कमे दी जायजा बैठक दी प्रधानता कीती। इस दरान उनें जम्मू कश्मीर दी विकास स्थिति दी समीक्षा कीती ते सरकारी कम्मकाज च पारदर्शिता ते जोआबदेही दी अपनी वचनबद्धता गी दोहराया। बैठक च उपमुख्मन्त्री सुरेन्द्र चौधरी, कैबिनेट मंत्री सकीना इत्तू, जावेद अहमद राणा, जावेद अहमद डार ते सतीश शर्मा हुंदे सने मुख्मन्त्री हुंदे सलाहकार नासिर असलम वानी, मुख्म सचिव अटल डुल्लू ते प्रशासनिक सचिवें बी हिस्सा लैता। मुख्म सचिव होरें इस मौके पर इक ब्योरेवार पेशकारी कीती। मुख्मन्त्री होरें कम्म गी तैह् समें सीमा दे अंदर तोड़ चाढ़ने दी जरूरतै पर जोर पाया ते मंत्रिमंडल दे अपने सदस्येंग गी गुजारश कीती जे ओह अपने मतेहूत मैह्कमे दे कम्मों दी सक्रियता कन्नै निगरानी करन। उमर होरें आखेआ जे उंदा दफतर होरने मैह्कमे दे कम्मों दा बी सिद्दे तौरा पर जायजा लै करोग। उनें आखेआ जे सरकार पारदर्शी ते जोआबदेह प्रशासन उपलब्ध करोआने लेई वचनबद्ध ऐ ते एह लाजमी ऐ जे हर मैह्कमा तालमेल बनाइयै कम्म करै तां जे विकास दे लाह भलेआं हेठली सतह तोहड़ी बी पुज्जी सकन।

<><><><><><>

## VP NHRC

उपराष्ट्रपति जगदीप धनखड़ होरें आखेआ ऐ जे मनुक्खी अधिकार म्हेशां थमां भारत दे नैतिक ताने-बाने च शामिल रेय न। नमीं दिल्ली च मनुक्खी अधिकारें सरबंधी राश्ट्री आयोग दे स्थापना दिवस कार्यक्रमै गी संबोधित करदे होई श्री धनखड़ होरें आखेआ जे भारती संविधान मनुक्खी अधिकारें लेई मार्गदर्शक ऐ। उनें आखेआ जे संविधान दी प्रस्तावना सब्बने लेई न्याऽ, आजादी ते बरोबरी दा हक उपलब्ध करोआंदी ऐ जेहूँ मनुक्खी अधिकारें दा सार न। उपराष्ट्रपति होरें आखेआ जे कुसै बी किस्मै दी फर्कोफर्की मनुक्खी अधिकारें दे बुनियादी पैहलुएं लेई चुनौती ऐ। धनखड़ होरें आखेआ जे लोकें गी मनुक्खी अधिकारें दी उल्लंघना दा बरोध करना लोड़चदा ऐ। उनें इब्बी आखेआ जे दुएं दे मनुक्खी अधिकारें दा सम्मान करना अपने मनुक्खी अधिकारें दा सम्मान करने ज्येया ऐ। आयोग दिएं कार्यवाहक अध्यक्ष विजया भारती सयानी ते प्रधान सचिव भरत लाल होरें बी कार्यक्रम गी संबोधित कीता।

<><><><><><>

## President-Malawi Visit

राश्ट्रपति द्रौपदी मुर्मू होरें अज्ज मलावी दे राश्ट्रपति लजारस चाकवेरा हुंदे नै दपक्खी बैठक कीती। एहूँ अलावा उनें डेलीगेशन स्तरै दी गल्लबात बी कीती ऐ। इस मौके पर कला ते संस्कृति, खेड़, युवा मामले ते फार्मा दे खेत्तर च 4 समझौता ज्ञापनें पर दस्तखत बी कीते गे। भारत नै मलावी गी इक जहार टन चोलें दी आपूर्ति करने दी घोशणा कीती ऐ। राश्ट्रपति मुर्मू होर मलावी दे राश्ट्री युद्ध स्मारक पर बी गेइयां।

<><><><><><>

## GoC-Rajouri

व्हाईट नाईट कोर दे जनरल आफिसर कमांडिंग जीओसी होरें अज्ज अपने राजौरी जिले दे दौरे दरान उत्थें सुरक्षा हालातें दा जायजा लैता। व्हाईट नाईट कोर दे जीओसी होरें जीओसी सीआईएफ हुंदे कन्नै राजौरी खेत्तरी दे कोलाकोट दा दौरा कीता जे उत्थें सुरक्षा हालातें दा जायजा लैता। एहूँ जानकारी उंदे सोशल मीडिया पोस्ट दे राएं मिली। जीओसी होरें खेत्तर च सुरक्षा ते शांति लेई कीते दे प्रयास आस्तै सब्बने फौज अधिकारिणें ते जवानें दी सराहना कीती।

<><><><><><>

## Arrest Poonch

भारतीय सेना दे आतंकवादी रोधी बल रोमियो फोर्स ते पुंछ पुलस दे विशेष कारवाइएं आले गुप नै अज्ज सुरनकोट सेक्टर दे दुनदक इलाके च आतंकवाद कन्नै जुड़े दे इक व्यक्ति गी फगड़ेआ। अधिकारिणें मताबक इस व्यक्तिथमां 4 ग्रनेड बी जब्त कीते गे न ते इसी हिरासत च लैने कन्नै जिले च हाल च गै हाने दे आतंकी मामले

गी नबेड़ने च बड़ी गै मदाद मिलोग। पुंछ पुलस दे मताबक इस व्यक्ति दी खीरी 2-3 हादसे जेहड़े पुंछ शैहर च ते सुरनकोट च होए हे, उंदे रु हत्थ होने दी शैका बी कीती जा'रदी ऐ।

<><><><><><>

## NMB-Poonch

नशा मुक्ति दे बारे जागरूकता फैलाने बक्खी इक गैह पुट्टदे होई, जिला प्रशासन पुंछ नै समाज कल्याण विभाग कन्नै मिलियै नशा मुक्ति भारत अभियान दे तैहत इक दिन दे सैमीनार दा आयोजन कीता ऐ। इस समारोह च 300 थमां बी मते ट्यूशना पढ़ाने आले अध्यापक ते विद्यार्थी शामिल हे। इस समारोह दा मकसद नशा मुक्त समाज दा सनेहा देना ऐ। साढ़े पुंछ दे जिला संवाददाता अनुभव मिसरी हुंदे मताबक पुंछ दे डिप्टी कमीशनर विकास कुंडल होर बी इस मौके पर मुख्ख परौहने दे रूपै च मजूद हे ते उनें समाज कल्याण विभाग दी इस सैमीनार दा आयोजन करने लेई सराहना कीती। उनें जोर पाया जे इस कबैतू गी डूी करने आस्तै शिक्षकें-विद्यार्थिं ऐ ते आम लोकें गी जागरूकता फैलाने लेई अगगे औना लोड़चदा। इस समारोह दे समापन च सब्बने भागीदारिएं पुंछ गी नशा मुक्त बनाने लेई प्रण लैता।

<><><><><><>

## PM-Karmayogi

प्रधानमंत्री नरेन्द्र मोदी होर कल नमीं दिल्ली च कर्मयोगी सप्ताह एनएलडब्ल्यू गी करगंन। इस पूरे हफते दरान हर कर्मयोगी अपनी योग्यता सरबंधी जुड़े दी सिखलाई च घट्टोघट्ट 4 घँटे दा लक्ष्य प्राप्त करने लेई वचनबद्धता होंगन। एनएलडब्ल्यू जां कर्मयोगी सप्ताह बक्ख-बक्ख मंत्रालयें, व्यक्तिगत भागीदारिएं, विभागें ते संगठनें राए सिखलाई गी समर्पित कीता जाग। सब्बने कर्मयोगी अपना लक्ष्य वेबिनारस, लैक्चर, मन्ने परमन्ने दे व्यक्तिएं राए दित्ती गेदिएं मास्टर क्लासें ते आईजीओ टी उप्पर व्यक्तिगत भूमका उप्पर आधारित मॉड्यूल दी मदाद कन्नै पूरा करगंन। इस हफते दरान मन्ने परमन्ने दे व्यक्तिएं गी लैक्चर, देने आस्तै सददेआ गेदा ऐ, जेहड़े नागरिक केन्द्रित कम्में काजें च कर्मयोगिएं दी प्रभावी ढंगै कन्नै मदाद बी करगंन। बक्ख-बक्ख मंत्रालय विभाग ते संगठन बी इस मौके पर सैमीनारस ते वर्कशापें दा आयोजन करगंन। कर्मयोगी सप्ताह एनएलडब्ल्यू अपने च गै सब्बने शा बड्डा समारोह होग जेहदे च यिविन सेवकें दी संगठात्मक क्षमता बधोग ते उनेंगी नमीं प्रेरणा मिलोग।

<><><><><><>

## PM Russia

प्रधानमंत्री नरेन्द्र मोदी होर इस म्हीने दी 22 तरीक गी 16में ब्रिक्स सम्मेलन आस्तै दऊं दिनें दे दौरे उप्पर रूस जांगन। एह सम्मेलन कजान च होआ'रदा ऐ जेहदा विशे सार वैश्विक विकास ते सुरक्षा लेई बहुपक्षवाद

गी मजबूत करना होग। एह सम्मेलन किश महत्वपूर्ण वैश्विक मसलें पर गल्लबात करने लेई मंच प्रदान करोग। एह सम्मेलन ब्रिक्स राएं शुरू कीती गेदिएं पैहलकदमिं दा पिरीक्षण करने लेई बी मौका प्रदान करोग ते भविक्ख च सैहयोग करने आस्तै गी प्रमुख खेत्तरें दी ताल करोग। विदेश मंत्रालय दे इक कथन दे राएं प्रधानमंत्री मोदी हुंदे कोला ब्रिक्स सदस्ये मुख्खें दे प्रधानमंत्री कन्नै दपक्खी गल्लबात करने दी मेद कीती जा'रदी ऐ।

<><><><><><>

## PM-NDA

प्रधानमंत्री नरेन्द्र मोदी होरें आखेआ जे सुचारु शासन, तेजिया कन्नै फैसला लैने करी एपडीए शासत राज्यें च निवेशकें गीते निवेश गी आकर्षित करने दा मौका मिलेआ ऐ। कल चंडीगढ़ च एनडीए दे लीडरें दी बैठक दा संबोधन करदे होई प्रधानमंत्री होरें गलाया ऐ जे एनडीए सरकार आम नागरिकें दे सुखने गी साकार करा'रदी ऐ। 2014 थमां गै लोकें च भरोसा बनाने च लग्गी दी ऐ। उनें इस गल्ल उप्पर जोर पाया जे बेहतर शासन दा मतलब गै लोकें दी समस्याएं दा हल्ल कड्डना ऐ। सब्बने एनडीए शासत राज्यें च आम लोकें दी समस्याएं गी नबेड़ने पर ध्यान केन्द्रित कीता जंदा ऐ। प्रधानमंत्री मोदी होरें लोकें लेई बेहतर शासन यानि पीटूजीटू दे संकल्प उप्पर विस्तार च गल्लबात कीती ते गलाया जे एनडीए सरकार समाज दे हर वर्ग दे लोकें दा दिल जित्ते दा ऐ। इस बैठक च हरियाणा विधानसभा चुनाएं च मोदी होरें गी मुबारकबाद देने दा संकल्प गी लैता ऐ।इक भारत दे संविधान दे 75 ब'रे पूरे होने दे मौके गी मनांदे होई संविधान का अमृत महोत्सव दा बी संकल्प लैता गेआ। देसे च एमरजेंसी लागू कीते जाने दे सरबंघै च ब'रे 2025 गी लोकतंत्र दी हत्या दे 50में ब'रे दे तौरे पर मनाने बारे इक प्रस्ताह बी बैठक दरान मंजूर कीता गेआ।

<><><><><><>

## Rajnath Singh DRDO

रक्षा मंत्री राजनाथ सिंह होरें आखेआ ऐ जे गैर रिवायती जंग नै रक्षा दे खेत्तर च नमीं चुनौतियां खड़ी करी दित्तियां न। उनें आखेआ जे तकनीकें जंग दे नमें रूपै गी जनम दित्ता ऐ ते ड्रोन, साइबर युद्ध ते जैविक थेआर बड्डी चुनौतियां बनियै उभरे न। रक्षा मंत्री होरें अज्ज नमीं दिल्ली च डेयर टू ड्रीम इनोवेशन दे 5में संस्करण दे शुभारंभ दे मौके पर एह गल्ल आक्खी। उलें रक्षा खेत्तर च शोध ते विकास दे बधदे महत्वै पर जोर दित्ता। उनें आखेआ जे जियां जिया दुनिया च बदलाव बावै करदे न तां तकनीकें शोध ते विकास दा महत्व बी उस्सै रफतार कन्नै बधै करदा ऐ। उनें आखेआ जे सरकार देसै दे रक्षा खेत्तर गी होर मता तकनीकें दे मुआफज बनाने लेई वचनबद्ध ऐ। डेयर टू ड्रीम पैहल दे प्रतिभागिं गी मुबारक दिंदे होई उनें आखेआ जे नोजवान जिसलै कोई नमां सुखना दिखदे न तां उंदे लेई नमीं चेन बी तैआर करी लैंदे न।

<><><><><><>

## SC-Child Marriage

सर्वोच्च अदालत आखेआ ऐ जे बच्चें दे ब्याह दी रोकथाम सरबंधी कनून गी व्यक्तिगत कनेनें आस्सेआ रोकेआ नेई जाई सकदा ऐ। अदालत आखेआ ऐ जे बच्चें दे ब्याह आपूं अपना जीवन साथी चुनने दी इच्छेआ दी उल्लंघना करदे न। मुख न्यायधीश डी.वाई. चन्द्रचूड़, न्यायमूर्ति मनोज मिश्रा हुंदी खंडपीठ देसें च बच्चें दे ब्याह दी रोकथाम आले कनूनें दी असरदार अमलावरी लेई दिशा निर्देश बी जारी कीते। मुख न्यायधीश चन्द्रचूड़ होरें आखेआ जे व्यक्तिगत कनूनें गी बाल-विवाह रोकने दे मकसद कन्नै बनाए गेदे राष्ट्री कनूनें दी अमलावरी च रूकावट नेई बनना लोड़चदा। पीठ नै इब्बी आखेआ जे बच्चें दे ब्याह दी रोकथाम आले कनून 2006च किश खामियां न। एह कनून बच्चें दे ब्याह रोकने ते इस प्रथा पर काबू पाने आस्तै बनाया गेआ हा। इस कनून नै 1929 आले कनून दी थाहर लैती ही।

<><><><><><>